

MALAYSIA
DEWAN RAKYAT
ATURAN URUSAN MESYUARAT

NASKHAH SAHIH/BAHASA MALAYSIA

<http://www.parlimen.gov>

HARI ISNIN, 31 OKTOBER 2016, PUKUL 10.00 PAGI

Bil. 38

PERTANYAAN-PERTANYAAN BAGI JAWAB LISAN

1. PR-1343-L77021
Datuk Liang Teck Meng [Simpang Renggam] minta **MENTERI PERUSAHAAN PERLADANGAN DAN KOMODITI** menyatakan jumlah terkini *Stock Pile* CPO dan apakah langkah Kementerian dalam menangani isu penurunan harga kelapa sawit.
2. PR-1343-L77000
Datuk Mohd Idris bin Jusi [Batu Pahat] minta **MENTERI SUMBER ASLI DAN ALAM SEKITAR** menyatakan langkah-langkah mengatasi isu yang berlanjutan dihadapi penduduk sepanjang pantai Batu Pahat, Benut. Isu hakisan pantai, isu menangani fenomena air pasang besar dan kenaikan paras air yang menyebabkan banjir kilat, dan air bertakung merosak tanaman dan kebun.
3. PR-1343-L76912
Dato' Noraini binti Ahmad [Parit Sulong] minta **MENTERI PERDAGANGAN DALAM NEGERI, KOPERASI DAN KEPENGGUNAAN** menyatakan apakah tindakan Kerajaan berdasarkan laporan *The State of Households* daripada Institut Penyelidikan Khazanah yang menyatakan inflasi harga makanan, 3.6% secara purata lebih tinggi daripada kadar inflasi keseluruhan iaitu 2.4%.
4. PR-1343-L76173
Dr. Ko Chung Sen [Kampar] minta **MENTERI BELIA DAN SUKAN** menyatakan :-
 - (a) jumlah peruntukan kewangan bagi meningkatkan prestasi atlet Malaysia di Sukan Olimpik sejak 5 tahun yang lalu sama ada negara kita mencapai hasil setimpal dengan wang yang telah dilaburkan; dan
 - (b) adakah Kerajaan bercadang menambahkan peruntukan untuk mencapai impian meraih pingat emas dalam Sukan Olimpik pada masa hadapan.

5. PR-1343-L77267
Datuk Wilson Ugak Kumbong [Hulu Rajang] minta **MENTERI PENDIDIKAN** menyatakan apakah tindakan susulan yang telah diambil oleh pihak Kementerian bagi melihat semula sistem pendawaian elektrik sekolah khusus di Negeri Sarawak, Ini kerana sebuah Sekolah Rendah Long Busang baru-baru ini musnah dijilat api disebabkan oleh pendawaian elektrik sekolah yang tidak teratur.
6. PR-1343-L77031
Puan Hajah Fuziah binti Salleh [Kuantan] minta **MENTERI KESIHATAN** menyatakan langkah yang diambil oleh pihak Kementerian dalam usaha membanteras penyakit *tuberculosis* (TB) dan untuk mengembalikan status Malaysia bebas dari ancaman penyakit TB seperti sebelum ini.
7. PR-1343-L76026
Datuk Koh Nai Kwong [Alor Gajah] minta **MENTERI PERDAGANGAN ANTARABANGSA DAN INDUSTRI** menyatakan pendekatan dan pembaharuan struktur perdagangan Kementerian bagi menggalakkan pengeksportan perkhidmatan syarikat tempatan pasaran global.
8. PR-1343-L76235
Tuan Sim Tze Tzin [Bayan Baru] minta **PERDANA MENTERI** menyatakan secara purata, berapakah penumpang yang menggunakan LRT laluan Kelana Jaya dan laluan Ampang setiap hari dari 2011 hingga 2016. Apakah peningkatan yang dicatatkan sejak pembukaan penuh stesen-stesen baru dalam sejak Jun 2016.
9. PR-1343-L77211
Tuan Anuar bin Abd. Manap [Sekijang] minta **MENTERI PENDIDIKAN TINGGI** menyatakan tujuan pelaksanaan Projek Rumah Komuniti dan bagaimanakah kepakaran jurusan kemahiran dari Politeknik dan Kolej Komuniti dapat digembleng bagi meluaskan konsep projek ini di seluruh negara terutamanya di Parlimen Sekijang.
10. PR-1343-L76330
Dato' Mansor bin Othman [Nibong Tebal] minta **MENTERI PERDAGANGAN DALAM NEGERI, KOPERASI DAN KEPENGGUNAAN** menyatakan usaha-usaha yang dilakukan oleh Kementerian bagi menggalakkan penyertaan ramai rakyat Malaysia dalam gerakan - gerakan koperasi bagi mencapai matlamat membudayakan gerakan koperasi.
11. PR-1343-L75721
Dato' Sri Wee Jeck Seng [Tanjong Piai] minta **MENTERI PERUSAHAAN PERLADANGAN DAN KOMODITI** menyatakan apakah bantuan yang akan dipertingkatkan untuk membantu golongan petani komoditi negara yang semakin terhimpit dengan keadaan komoditi antarabangsa yang tidak menentu dan harga juga mengalami kejatuhan.

12. PR-1343-L75752
Tuan William Leong Jee Keen [Selayang] minta **MENTERI SUMBER MANUSIA** menyatakan tindakan yang diambil untuk membantu perniagaan-perniagaan kecil dalam pelaksanaan gaji minimum yang akan menyebabkan banyak tadika, perniagaan-perniagaan pengasuhan anak dan perniagaan-perniagaan kecil untuk tutup.
13. PR-1343-L76397
Dato' Haji Abdul Rahman bin Haji Mohamad [Lipis] minta **MENTERI KEWANGAN** menyatakan hasil siasatan Penubuhan Pasukan Khas Jabatan Kastam Diraja Malaysia (JKDM) bagi menyiasat sindiket kereta klon yang dibawa masuk dari negara luar ke dalam negara.
14. PR-1343-L76316
Tuan Wan Hasan bin Mohd Ramli [Dungun] minta **MENTERI KERJA RAYA** menyatakan asas perkiraan kadar tol LPT2, apakah manfaat kepada rakyat Terengganu jika dibandingkan dengan Lebuhraya PAN Borneo tanpa tol dan memberi faedah terus kepada rakyat di Sabah dan Sarawak.
15. PR-1343-L76060
Dr. Ismail bin Daut [Merbok] minta **MENTERI SAINS, TEKNOLOGI DAN INOVASI** menyatakan kejayaan-kejayaan yang telah dicapai Malaysia selaku tuan rumah kepada Pusat Sains, Teknologi dan Inovasi Antarabangsa (ISTIC) bagi Kerjasama Selatan-Selatan di bawah UNESCO dan apakah perancangan kementerian bagi memanfaatkan sepenuhnya pusat tersebut selepas UNESCO melanjutkan tempoh Malaysia sebagai tuan rumah penggal baru bermula tahun lalu.
16. PR-1343-L75528
Puan Teresa Kok Suh Sim [Seputeh] minta **MENTERI KEWANGAN** menyatakan hutang negara berbanding dengan KDNK pada 30 September 2015 dan 30 September 2016. Nyatakan jumlah hutang yang disumbangkan oleh syarikat dan projek berkaitan dengan 1MDB.
17. PR-1343-L77059
Tuan Haji Ahmad Lai bin Bujang [Sibuti] minta **MENTERI DALAM NEGERI** menyatakan apakah tindakan pihak berkuasa bagi membanteras premis judi online yang semakin bertambah di kawasan Batu Niah, Sepupok dan Taman Tunku dalam Parlimen Sibuti.
18. PR-1343-L76892
Tuan Loke Siew Fook [Seremban] minta **MENTERI PELANCONGAN DAN KEBUDAYAAN** menyatakan jumlah perbelanjaan oleh Tourism Malaysia untuk tujuan pengiklanan bagi tahun 2016 serta nilai kontrak yang dianugerahkan kepada setiap agensi pengiklanan yang dilantik oleh Tourism Malaysia.
19. PR-1343-L77369
Dato' Normala binti Abdul Samad [Pasir Gudang] minta **PERDANA MENTERI** menyatakan apakah perancangan pihak Kerajaan bagi membangun dan membina perumahan mampu milik PR1MA di Johor, khususnya dalam kawasan Parlimen Pasir Gudang dan bilakah perumahan terus akan mula dibina.

20. PR-1343-L76898
Dato' Seri Abdul Hadi bin Awang [Marang] minta **PERDANA MENTERI** menyatakan apakah pelan tindakan pembiayaan politik berintegriti yang telah dirangka oleh Jawatankuasa Konsultatif Nasional Mengenai Pembiayaan Politik (JKNMPP) dan sejauh mana Kerajaan bersedia melaksanakan cadangan yang dikemukakan.
21. PR-1343-L75604
Datuk Linda Tsen Thau Lin [Batu Sapi] minta **MENTERI DALAM NEGERI** menyatakan cara mengatasi masalah kejadian rompakan dan kecurian yang sering berlaku di bandar Lee Tat dan bandar Kim Fung di Sandakan.
22. PR-1343-L77137
Dato' Mohd Ariff Sabri bin Abdul Aziz [Raub] minta **MENTERI PERTANIAN DAN INDUSTRI ASAS TANI** menyatakan :-
- (a) adakah tahap SSL 70% bekalan beras dicapai oleh negara; dan
 - (b) berapakah nilai import beras tahunan dari tahun 2014 sehingga bulan Jun 2016.
23. PR-1343-L76841
Dato' Sri Bung Moktar bin Radin [Kinabatangan] minta **PERDANA MENTERI** menyatakan bilakah Kerajaan Persekutuan dijangkakan menyerahkan sepenuhnya kuasa autonomi dari segi pentadbiran, perjawatan, perancangan serta pelaksanaan program-program pembangunan kepada Kerajaan Negeri Sabah.
24. PR-1343-L75766
Tuan Fong Kui Lun [Bukit Bintang] minta **MENTERI WILAYAH PERSEKUTUAN** menyatakan berapa bilangan projek pembangunan bangunan berbilang tingkat dalam tempoh 5 tahun lalu, jumlah kadar penginapan (*occupancy*) yang dicapai, masalah-masalah yang dihadapi dan cadangan penyelesaian.
25. PR-1343-L75920
Datuk Seri Panglima Haji Abdul Ghapur bin Haji Salleh [Kalabakan] minta **MENTERI LUAR NEGERI** menyatakan :-
- (a) apakah langkah-langkah khusus yang telah diambil Kementerian dalam menangani tuntutan Filipina terhadap negeri Sabah; dan
 - (b) apakah status terkini usaha ini.
26. PR-1343-L76180
Dr. Ko Chung Sen [Kampar] minta **MENTERI KEWANGAN** menyatakan :-
- (a) kesan GST ke atas KDNK Malaysia kesan GST ke atas penentuan keuntungan syarikat-syarikat, khususnya bagi perusahaan kecil dan sederhana; dan
 - (b) kepastian bahawa kadar GST tidak akan dinaikkan sekiranya Barisan Nasional memenangi pilihan raya umum akan datang.

27. PR-1343-L76021
Tan Sri Datuk Seri Panglima Joseph Pairin Kitingan [Keningau] minta **MENTERI PENDIDIKAN** menyatakan sama ada apa yang diumumkan baru-baru ini mengenai Sekolah Sains di Keningau dan SMK Wawasan Desa untuk Tambunan dimuatkan dalam Bajet 2017.
28. PR-1343-L75551
Tuan Budiman bin Mohd. Zohdi [Sungai Besar] minta **MENTERI PELANCONGAN DAN KEBUDAYAAN** menyatakan berapakah jumlah pinjaman dana pelancongan di bawah Tabung Pembangunan Infrastruktur Pelancongan yang telah diluluskan dan daripada jumlah ini, berapakah jumlah permohonan yang telah diluluskan kepada pengusaha produk pelancongan luar bandar.
29. PR-1343-L75854
Tan Sri Datuk Seri Panglima Annuar bin Musa [Ketereh] minta **MENTERI KEWANGAN** menyatakan sejauh manakan kutipan GST yang diperoleh membantu kewangan negara yang terjejas akibat kejatuhan komoditi utama.
30. PR-1343-L76750
Puan Nurul Izzah binti Anwar [Lembah Pantai] minta **MENTERI PENGANGKUTAN** menyatakan status laporan serpihan pesawat MH370 di perairan Afrika Selatan, Mozambique, Mauritius dan Tanzania dan adakah pihak Kerajaan telah menjalankan siasatan bersama Australian Transport Safety Bureau untuk mengesahkan serpihan tersebut.
31. PR-1343-L76241
Tuan Idris bin Haji Ahmad [Bukit Gantang] minta **PERDANA MENTERI** menyatakan adakah wujud undang-undang yang diguna pakai oleh Suruhanjaya Pencegahan Rasuah Malaysia (SPRM) apabila wang suapan di kembali balik kepada pemberi rasuah maka ia dianggap sudah bersih daripada tuduhan rasuah.
32. PR-1343-L76006
Tuan Wong Chen [Kelana Jaya] minta **MENTERI PERDAGANGAN ANTARABANGSA DAN INDUSTRI** menyatakan :-
(a) apakah status terkini mengenai Perjanjian Kerjasama Ekonomi Komprehensif Serantau (RCEP); dan
(b) sudahkah satu analisis kos faedah Perjanjian RCEP dikendalikan.
33. PR-1343-L75641
Dr. Michael Jeyakumar Devaraj [Sungai Siput] minta **MENTERI PERDAGANGAN ANTARABANGSA DAN INDUSTRI** menyatakan sama ada Kerajaan Malaysia bercadang mengadakan konsultasi bersama NGO masyarakat sivil (*civil society*) terhadap Perjanjian Regional Comprehensive Economic Partnership (RCEP) yang sedang dirunding oleh Kerajaan Malaysia.

34. PR-1343-L76430
Tuan N. Surendran [Padang Serai] minta **MENTERI DALAM NEGERI** menyatakan sama ada apa-apa tindakan disiplin diambil ke atas anggota polis berkenaan apa-apa kematian dalam tahanan polis atau kes kematian disebabkan tembakan oleh polis dalam tempoh 2005 hingga 2016 dengan butiran terperinci.
35. PR-1343-L75835
Tuan Gobind Singh Deo [Puchong] minta **MENTERI DALAM NEGERI** menyatakan merujuk kepada insiden letupan kecil di Puchong Jaya pada 28 Jun 2016 dan nyatakan langkah-langkah yang telah diambil bagi membendung masalah berunsur keganasan melibatkan kumpulan militan IS di Malaysia.
36. PR-1343-L76667
Dato' Haji Mahfuz bin Omar [Pokok Sena] minta **MENTERI PERTANIAN DAN INDUSTRI ASAS TANI** menyatakan apakah langkah-langkah yang diambil untuk mengurangkan kebergantungan sumber bekalan daging lembu daripada luar negara dan adakah Kementerian mempunyai cadangan untuk menghidupkan kembali Projek National Feedlot Corporation Sdn. Bhd.
37. PR-1343-L76651
Dr. Hajah Siti Mariah binti Mahmud [Kota Raja] minta **MENTERI KESIHATAN** menyatakan jumlah graduan doktor perubatan, graduan doktor pergigian dan graduan farmasi yang menunggu giliran untuk menjadi pelatih di KKM, berapa lama masa menunggu dan apakah perancangan jangka panjang Kementerian untuk mengatasi "*backlog*" ini.
38. PR-1343-L76719
Tuan Oscar Ling Chai Yew [Sibü] minta **MENTERI KEWANGAN** menyatakan bagaimana Kerajaan meningkatkan daya saing negara kita dan langkah yang diambil untuk mengurangkan impak kemerosotan ekonomi dunia terhadap pasaran dalam negara. Adakah pengutipan GST yang tidak mencapai sasaran pada dua suku tahun pertama menunjukkan pasaran dalam negara kita sudah lemah.
39. PR-1343-L76521
Dato' Dr. Tan Kee Kwong [Wangsa Maju] minta **MENTERI DALAM NEGERI** menyatakan sama ada pihak Kementerian masih berhasrat membawa masuk 1.5 juta pekerja warga Bangladesh, dan jika ada adakah pekerja asing tanpa izin yang sedia ada, serta pelarian Rohingya dan pelarian Syria tidak dapat menepati keperluan pasaran buruh.
40. PR-1343-L76795
Dato' Seri Dr. Wan Azizah binti Wan Ismail [Permatang Pauh] minta **PERDANA MENTERI** menyatakan status terkini pembayaran pampasan oleh Kerajaan Arab Saudi kepada keluarga mangsa tragedi runtuhannya di Mekah pada musim haji tahun 2015 serta apakah langkah yang diambil oleh Kerajaan bagi memastikan pembayaran tersebut ditunaikan oleh Arab Saudi.

41. PR-1343-L77094
Dato' Seri Mohamed Azmin bin Ali [Gombak] minta **MENTERI KEWANGAN** menyatakan apakah strategi Kerajaan untuk membantu rakyat mendapatkan pinjaman bank bagi pembiayaan rumah mampu milik memandangkan syarat dan prosedur Bank Negara (BNM) yang begitu ketat.
42. PR-1343-L76157
Dato' Fauzi bin Abdul Rahman [Indera Mahkota] minta **MENTERI PENDIDIKAN** menyatakan adakah Kementerian bersedia mengkaji semula sistem pendidikan negara seperti pandangan daripada Kebawah Duli Yang Maha Mulia Sultan Johor dan Kerajaan Sarawak. Adakah Kementerian bersedia menimbang semula pengujudan Sekolah Wawasan sepertimana yang telah diwarwarkan satu masa dahulu.
43. PR-1343-L76907
Tuan R. Sivarasa [Subang] minta **PERDANA MENTERI** menyatakan bilakah Kerajaan akan membatalkan pengklasifikasian Laporan Ketua Audit Negara berkaitan 1Malaysia Development Berhad sebagai satu rahsia rasmi.
44. PR-1343-L76178
Dr. Ko Chung Sen [Kampar] minta **MENTERI DALAM NEGERI** menyatakan :-
- (a) bilangan orang yang ditangkap kerana terlibat dengan aktiviti pengganas sejak tahun 2013 dan bilangan daripada orang yang ditangkap ini yang melibatkan anggota Negara Islam (IS); dan
 - (b) berapa ramai daripada pengganas yang ditangkap ini telah dipulihkan dan dibebaskan setakat ini.
45. PR-1343-L76678
Tuan Lim Guan Eng [Bagan] minta **PERDANA MENTERI** menyatakan sebab tiada tindakan oleh SPRM sehingga kini terhadap Pengerusi Lembaga Kemajuan Wilayah Pulau Pinang (PERDA) yang dilaporkan menjual tanah awam yang diambilalih daripada orang awam untuk tujuan perumahan PERDA di Seberang Perai Selatan di bawah harga pasaran sehingga kerugian RM15.2 juta untuk dibina rumah kedai yang tidak dipersetujui oleh anak syarikat PERDA seperti PERDA Ventures Sdn. Bhd.
46. PR-1343-L77142
Dato' Johari bin Abdul [Sungai Petani] minta **MENTERI KESIHATAN** menyatakan :-
- (a) berapa ramai pelajar lulusan kedokteran, kedokteran gigi dan farmasi yang telah mendaftar dengan kerajaan seperti yang dikehendaki oleh undang-undang tetapi belum diberi penempatan sehingga Ogos 2016; dan
 - (b) apakah sebab-sebab utama kelewatan penempatan mereka.

47. PR-1343-L75535
Dato' Sri Hasan bin Malek [Kuala Pilah] minta **PERDANA MENTERI** menyatakan apakah langkah jangka panjang dan proaktif pihak JAKIM dalam memastikan segala usaha, bantuan dan kerjasama yang diberikan kepada komuniti Islam di negara lain terutamanya di rantau Asia Tenggara mampu memberikan kesan serta nilai impak yang terbaik.
48. PR-1343-L77181
Tuan Tony Pua Kiam Wee [Petaling Jaya Utara] minta **MENTERI KEWANGAN** menyatakan tindakan yang telah diambil oleh Bank Negara Malaysia ke atas Cheah Tek Kuang dan Joanna Yu yang telah membantu 'cover up' transaksi penghantaran wang haram di dalam Ambank.
49. PR-1343-L77409
Datuk Haji Shabudin bin Yahaya [Tasek Gelugor] minta **MENTERI KOMUNIKASI DAN MULTIMEDIA** menyatakan status penyerahan set dekoder Mytv kepada penduduk di seluruh Malaysia dan bagaimanakah kaedah pengagihan dilaksanakan kepada golongan sasaran.

ATURAN URUSAN MESYUARAT DAN USUL-USUL

1. (D.R. 17/2016) **Rang Undang-undang Perbekalan 2017 – Menyambung semula perbahasan atas masalah, “ Bahawa Rang Undang-Undang ini dibacakan kali yang kedua sekarang, “ (27 Oktober, 2016)**

DAN

Usul dibuat oleh YAB Menteri Kewangan dan masalah dicadangkan :-

“Bahawa Dewan ini, mengikut subseksyen 4(3) Akta Kumpulan Wang Pembangunan 1966 [Akta 406], membuat ketetapan iaitu suatu jumlah wang sebanyak tidak lebih dari empat puluh lapan bilion ringgit (RM48,000,000,000) dibelanjakan daripada Kumpulan Wang Pembangunan bagi tahun 2017, dan bagi tujuan dan butiran perbelanjaan pembangunan yang dinyatakan di bawah Maksud Pembangunan atau (“P”) dalam senarai Anggaran Perbelanjaan Persekutuan 2017, yang dibentangkan sebagai Kertas Perintah 25 Tahun 2016, adalah diuntukkan di bawah Maksud-maksud yang berkenaan jumlah-jumlah yang bersestentangan dengan butiran-butiran itu di ruangan enam dan tujuh senarai tersebut.”

Menyambung semula Perbahasan atas masalah (27 Oktober, 2016)

2. **Menteri di Jabatan Perdana Menteri** akan mencadangkan:-

“BAHAWA pada Selasa, 25 Oktober 2016 semasa sesi Kamar Khas, Yang Berhormat Lim Lip Eng, Ahli Parlimen Kawasan Segambut dengan biadapnya telah mempersoalkan kuasa Yang di-Pertua Dewan Rakyat yang boleh dikenakan ke atas beliau kerana enggan mengikut arahan Tuan Yang di-Pertua.

BAHAWA Yang Berhormat Segambut juga telah menghina Yang di-Pertua Dewan Rakyat dengan kenyataan *“You are a disgrace to Parliament.... we are elected and you are appointed”*. Kenyataan Yang Berhormat Segambut telah menghina Yang di-Pertua Dewan Rakyat dan Majlis Mesyuarat Dewan Rakyat yang telah memilih beliau sebagai Yang di-Pertua Dewan Rakyat berdasarkan Perkara 57 Fasal 1 Perlembagaan Persekutuan.

BAHAWA Yang Berhormat Segambut sebelum itu telah mengeluarkan satu kenyataan pada 23 Oktober 2016 yang mempertikaikan dan memperlekehkan keputusan Yang di-Pertua Dewan Rakyat berhubung dengan pertanyaan - pertanyaan serta usul yang berkaitan tindakan sivil *in rem* oleh Department of Justice mengenai isu *sub judice*.

BAHAWA Yang Berhormat Segambut juga telah mengeluarkan satu kenyataan semasa sidang media di lobi Parlimen pada Khamis, 7 April 2016 yang menyatakan bahawa Yang di-Pertua Dewan Rakyat gagal dalam usaha-usaha penambahbaikan Parlimen yang sedang dilaksanakan oleh Yang di-Pertua Dewan Rakyat dan meminta agar Yang di-Pertua Dewan Rakyat meletakkan jawatan.

DAN BAHAWA perbuatan dan kenyataan–kenyataan yang dibuat oleh Yang Berhormat Segambut itu adalah merupakan satu penghinaan kepada Tuan Yang di-Pertua Dewan Rakyat yang menjalankan tugas sebagai Pengerusi Dewan ini dan demikian bererti penghinaan juga kepada Dewan Rakyat yang turut mencemarkan nama baik dan prestij Dewan Rakyat.

MAKA INILAH DIPERSETUJUI BAHAWA Yang Berhormat Lim Lip Eng, Ahli Parlimen Kawasan Segambut hendaklah digantung daripada perkhidmatan Majlis Mesyuarat selama enam (6) bulan dari tarikh keputusan usul ini diluluskan.”

- | | | | |
|----|---------------|---|-------------------------------|
| 3. | (D.R.18/2016) | Rang Undang-Undang Kewangan 2016 | Bacaan Kali Yang Kedua |
| | | [Menteri Kewangan] | |
| 4. | (D.R.13/2016) | Rang Undang-Undang Mahkamah (Kaedah-Kaedah Pemulaan Tindakan Sivil) 2016 | “ |
| | | [Menteri di Jabatan Perdana Menteri] | |
| 5. | (D.R.16/2016) | Rang Undang-Undang Pentadbiran Undang-undang Islam (Wilayah-Wilayah Persekutuan) (Pindaan) 2016 | “ |
| | | [Menteri di Jabatan Perdana Menteri] | |
| 6. | (D.R.15/2016) | Rang Undang-Undang Pendaftaran Kelahiran dan Kematian (Pindaan) 2016 | “ |
| | | [Menteri Dalam Negeri] | |

7. **Menteri Kewangan** akan mencadangkan:-

“Bahawa Dewan ini, mengikut peruntukan subperenggan 8(3)(a)(iv) Akta Tatacara Kewangan 1957 [Akta 61], mengambil ketetapan bersetuju supaya Kerajaan Malaysia melalui Menteri Kewangan (Diperbadankan), membuat pelaburan dengan menukarkan sebahagian pinjaman yang diberikan oleh Kerajaan Malaysia sebanyak RM500 juta kepada Small Medium Enterprise Development Bank Malaysia Berhad (SME Bank), sebuah syarikat yang dimiliki oleh Menteri Kewangan (Diperbadankan) kepada ekuiti bersamaan dengan Lima Ratus Juta (500,000,000) unit saham biasa pada RM1 bagi satu unit saham”.

8. **Menteri Dalam Negeri** akan mencadangkan:-

“Bahawa Majlis ini membuat suatu ketetapan menurut sub-seksyen 4(11), Akta Kesalahan Keselamatan (Langkah-langkah Khas) 2012 supaya sub-seksyen 4(5), Akta ini hendaklah terus berkuatkuasa bagi tempoh 5 tahun lagi mulai dari 31 Julai 2017”.

9. **Dato' Seri Abdul Hadi bin Awang [Marang]** akan mencadangkan:-

“Bahawa Dewan ini memberikan kebenaran menurut Peraturan Mesyuarat 49 (1) kepada Yang Berhormat Ahli bagi kawasan Marang untuk mencadangkan suatu Rang Undang-undang Ahli Persendirian bernama Rang Undang-undang Mahkamah Syariah (Bidang Kuasa Jenayah) (Pindaan) 2016 seperti berikut:-

i. menggantikan Seksyen 2 dengan seksyen berikut:

“**2.** Mahkamah Syariah akan mempunyai kuasa ke atas seseorang penganut agama Islam dan di dalam hal-hal kesalahan di bawah perkara-perkara yang disenaraikan di dalam Butiran 1 Senarai Negeri di bawah Jadual Kesembilan Undang-Undang Persekutuan.”; dan

ii. memasukkan selepas seksyen 2 dengan seksyen berikut:

“**2A.** Dalam menjalankan undang-undang jenayah di bawah Seksyen 2 Mahkamah Syariah berhak menjatuhkan hukuman yang dibenarkan oleh undang-undang syariah berkaitan hal-hal kesalahan yang disenaraikan di bawah seksyen yang disebutkan diatas, selain dari hukuman mati.”

[Menteri di Jabatan Perdana Menteri]

10. PR-1343-U75583

Datuk Dr. Makin @ Marcus Mojigoh [Putatan] akan mencadangkan:-

"Bahawa Dewan ini mengambil maklum bahawa, kesan pemanasan global telah mencapai satu tahap yang amat serius di mana disebabkan peningkatan paras air laut, terdapat banyak sawah-sawah padi tidak lagi dapat ditanam dengan tanaman padi disebabkan sawah-sawah padi ini telah dicemari dengan air masin. Dan mengambil maklum juga bahawa kesan daripada fenomena ini, para petani terutama sekali mereka yang menanam padi di sawah-sawah padi yang berkedudukan tanah rendah atau pesisir pantai kehilangan punca pendapatan dan sekaligus kualiti hidup mereka turut terjejas. Dan mengambil maklum juga bahawa, sebagai langkah mitigasi bagi memulihkan ekonomi para petani ini, Kerajaan hendaklah membantu mereka dengan memperkenalkan tanaman bernilai komersial lain, yang sesuai ditanam di sawah yang dimasuki air masin tersebut seperti penanaman kelapa pandan dan sebagainya. Dan mengambil maklum juga bahawa penyediaan dan pengorekan perparitan untuk meninggikan paras tanah yang dimaksudkan di atas, di kawasan yang terlibat akan membolehkan kawasan yang terlibat tidak ditenggelami air masin. Maka, bagi menangani masalah ini, Dewan ini hendaklah mengambil ketetapan bahawa, di samping menangani isu pemanasan global secara serius, Kerajaan juga harus segera membantu para petani (atau pesawah padi) dalam mengusahakan semula sawah-sawah padi mereka yang terjejas oleh fenomena ini, dengan memperkenalkan tanaman bernilai komersial yang baru di tanah tersebut."

[Menteri Pertanian dan Industri Asas Tani]

11. PR-1343-U75584

Datuk Dr. Makin @ Marcus Mojigoh [Putatan] akan mencadangkan:-

"Bahawa Dewan ini mengambil maklum bahawa dengan purata hujan tahunan negara kini telah meningkat sering kita dengar tentang keadaan banjir kilat yang telah banyak menyebabkan kemusnahan harta benda, ameniti sosial, kerosakan alam sekitar dan lain-lain yang menjangkau jutaan ringgit nilainya. Dan mengambil maklum juga bahawa keadaan banjir ini ditambah burukkan lagi di mana banyak kolam dan paya ditimbus bagi pembangunan hartanah dan sebagainya. Ini menyebabkan sungai-sungai dan terusan tidak lagi dapat menampung jumlah air yang mengalir secara mendadak. Dan mengambil maklum juga bahawa, sebagai langkah mitigasi, kolam-kolam air yang luas boleh diwujudkan dalam sesuatu kawasan bagi menampung air hujan lebat yang turun sebelum ianya mengalir ke sungai-sungai dan terusan, sekali gus dapat mengurangkan kejadian banjir kilat. Dan mengambil maklum juga bahawa, takungan air di kolam-kolam tadi boleh juga dirawat dan disalurkan ke empangan bekalan air yang mana boleh digunakan sebagai air terawat oleh para pengguna. Dan mengambil maklum juga bahawa air daripada takungan kolam itu juga boleh disalurkan kepada industri-industri yang memerlukannya di samping digunakan untuk menyiram tanaman atau taman-taman."

Maka, bagi menangani masalah banjir kilat ini, dewan yang mulia ini hendaklah mengambil ketetapan bahawa Kerajaan hendaklah mensyaratkan bahawa sebelum sesuatu zon itu dibangunkan, satu kawasan kolam takungan air hendaklah disediakan bagi maksud di atas."

[Menteri Sumber Asli dan Alam Sekitar]

12. PR-1343-U75585

Datuk Dr. Makin @ Marcus Mojigoh [Putatan] akan mencadangkan:-

"Bahawa Dewan ini mengambil maklum bahawa, ramai graduan serta lulusan sekolah menengah tidak berpeluang untuk mendapatkan kerja dan kebanyakan mereka ini akhirnya hanya berlegar di kampung masing-masing dan tidak berpendapatan. Dan mengambil maklum juga bahawa, masih banyak peluang-peluang perniagaan yang boleh diusahakan di kampung-kampung sekiranya mereka yang berminat mendapat latihan, bimbingan dan bantuan kewangan yang secukupnya. Dan mengambil maklum juga bahawa pihak Kerajaan telah beberapa kali mengutarakan program pembangunan desa seperti program satu kampung satu industri, namun belum ada lagi program seumpamanya yang benar-benar berjaya. Dan mengambil maklum juga bahawa kebanyakan bekalan bahan mentah bagi penghasilan produk makanan, herba, tenusu dan lain-lain lagi boleh didapati di kampung-kampung dengan mudah. Dan mengambil maklum juga bahawa, melalui program "cottage industry" bukan sahaja penduduk kampung yang terlibat dalam program ini akan mendapat manfaat, malah negara secara keseluruhannya akan mendapat manfaat daripada aliran aktiviti ekonomi yang dijana. Maka, bagi menangani masalah ini, Dewan yang mulia ini hendaklah mengambil ketetapan bahawa Kerajaan merumus satu mekanisme yang lebih efektif bagi menggalakkan penglibatan penduduk kampung dalam aktiviti "cottage industry" yang mana akan dapat membawa manfaat kepada 15-20 orang daripada setiap kampung."

[Menteri Kemajuan Luar Bandar dan Wilayah]

13. PR-1343-U75586

Datuk Dr. Makin @ Marcus Mojigoh [Putatan] akan mencadangkan:-

"Bahawa Dewan ini mengambil maklum bahawa kos sara hidup keluarga telah meningkat dengan mendadak dan ini dapat dirasakan begitu hebat sekali oleh mereka daripada golongan berpendapatan rendah. Dan mengambil maklum juga bahawa teknologi solar yang terdapat pada hari ini dapat membekalkan tenaga elektrik dengan murah dan mesra alam. Dan mengambil maklum juga bahawa kadar penurunan hujan di negara ini agak tinggi dan boleh membekalkan bekalan air mentah yang cukup sekiranya ditadah dan disimpan dengan baik.

Maka, bagi meringankan kos sara hidup keluarga terutama sekali mereka yang dari golongan berpendapatan rendah, Dewan yang mulia ini hendaklah mengambil ketetapan bahawa, semua pembinaan PPRT yang baru hendaklah dilengkapi dengan sistem tenaga solar dan tangki tadahan air bagi membolehkan pemilik rumah tersebut menurunkan sedikit kos sara hidup keluarga mereka."

[Menteri Kesejahteraan Bandar, Perumahan dan Kerajaan Tempatan]

14. PR-1343-U75587

Datuk Dr. Makin @ Marcus Mojigoh [Putatan] akan mencadangkan:-

"Bahawa Dewan ini mengambil maklum bahawa, terdapat desas-desus bahawa pencarum Kumpulan Wang Simpanan Pekerja (KWSP) yang masih menabung dalam KWSP, yang telah mencapai umur 75 tahun, yang dikatakan mencecah jumlah 260,000 orang, tidak lagi dibayar dividen ke atas simpanan mereka di dalam KWSP, seperti yang disiarkan oleh akhbar The Sun Daily. Dan mengambil maklum juga bahawa, kekeliruan ini adalah disebabkan oleh polisi KWSP yang dikeluarkan pada tahun 2008, melalui Akta KWSP 1991 yang menerangkan bahawa simpanan para pencarum yang telah mencapai umur 75 tidak akan dibayar dividen. Dan mengambil maklum juga bahawa para pesara yang masih menyimpan akaun dengan pihak KWSP masih memerlukan sumber pendapatan yang terurus dengan kadar pulangan yang baik dan KWSP dikatakan memberikan kadar pulangan yang baik serta terjamin selamat. Maka, bagi menangani masalah ini dan membela nasib para pendeposit KWSP yang dimaksudkan, Dewan yang mulia ini hendaklah mengambil ketetapan bahawa Kerajaan hendaklah segera meminda Akta 1991 dan membatalkan polisi KWSP 2008 bagi memastikan agar para pencarum atau penabung KWSP menerima dividen selagi mereka masih mempunyai akaun yang aktif dengan KWSP."

[Menteri Kewangan]

15. PR-1343-U75588

Datuk Dr. Makin @ Marcus Mojigoh [Putatan] akan mencadangkan:-

"Bahawa Dewan ini mengambil maklum bahawa, kos barangan dan kos sara hidup di negeri Sabah adalah antara yang tertinggi di negara ini dan polisi kabotaj, dikatakan sebagai antara penyebab utama keadaan ini berlaku. Dan mengambil maklum juga bahawa, akibat polisi kabotaj ini, kapal-kapal dagang dari luar negara tidak dibenar memunggah dan mengangkut barangan dari mana-mana pelabuhan di Malaysia kecuali di Pelabuhan Klang. Ini menyebabkan barangan tersebut terpaksa di angkut semula dengan kos tambahan ke pelabuhan-pelabuhan di negeri Sabah dan Sarawak. Dan mengambil maklum juga bahawa disebabkan polisi kabotaj ini, kadar caj penghantaran antara pelabuhan ditetapkan oleh pihak perkapalan dengan kawalan terhad oleh pihak Kerajaan. Misalnya, caj penghantaran kontena 20 kaki dari pelabuhan Klang ke pelabuhan Kota Kinabalu ialah RM2,436, ke pelabuhan Sandakan RM3,235 dan ke pelabuhan Tawau RM3,336.

Ternyata caj ini adalah terlalu tinggi jika dikira dari segi jarak batu nautika antara pelabuhan berbanding dengan caj penghantaran di pelabuhan-pelabuhan lain. Maka, bagi menangani masalah ini serta mengimbangi harga barangan dan kos sara hidup di negeri Sabah, Dewan yang mulia ini hendaklah mengambil ketetapan bahawa Kerajaan hendaklah segera membatalkan polisi kabotaj ini bagi meringankan beban rakyat Sabah dan Sarawak khasnya."

[Menteri Kewangan]

16. PR-1343-U75589

Datuk Dr. Makin @ Marcus Mojigoh [Putatan] akan mencadangkan:-

"Bahawa Dewan ini mengambil maklum bahawa banjir warga asing ke negara ini telah membawa budaya yang kurang baik di negara ini di mana mereka dengan sewenang-wenangnya membuang sampah merata-rata dan ini dapat kita lihat di kota-kota besar pada hujung minggu di mana mereka ini keluar beriadah. Dan mengambil maklum juga bahawa, sejak akhir-akhir ini, penduduk tempatan juga telah mula dijangkiti dengan sikap kutu sampah yang dimaksudkan di atas, di mana penduduk tempatan juga mula membuang sampah merata-rata. Dan mengambil maklum juga bahawa penularan pelbagai jenis penyakit bawaan vektor, tikus, lipas dan lalat, pembuangan sampah merata-rata telah menambah-burukkan lagi ancaman kesihatan di negara ini. Maka, bagi menangani masalah ini, Dewan yang mulia ini hendaklah mengambil ketetapan bahawa Kerajaan Malaysia hendaklah meminda undang-undang bagi menghukum kutu-kutu sampah dengan hukuman lebih berat lagi disamping menggalakkan lebih banyak usaha untuk kitar semula dijalankan."

[Menteri Kesejahteraan Bandar, Perumahan dan Kerajaan Tempatan]

17. PR-1343-U76223

Tuan Nga Kor Ming [Taiping] akan mencadangkan:-

"Bahawa Dewan yang mulia ini meluluskan satu ketetapan supaya Laporan Ketua Audit Negara berkenaan dengan isu 1 MDB (1 Malaysia Development Bhd) dibentang dan dikemukakan untuk perbincangan di Dewan Rakyat dengan kadar segera."

[Perdana Menteri]

18. PR-1343-U76225

Tuan Nga Kor Ming [Taiping] akan mencadangkan:-

"Bahawa Dewan yang mulia ini meluluskan satu ketetapan supaya YAB Perdana Menteri dan seluruh anggota Menteri Kabinet mengisytiharkan harta dan aset mereka kepada Dewan Rakyat tiap-tiap tahun pada bulan Disember."

[Perdana Menteri]

19. PR-1343-U76226

Tuan Nga Kor Ming [Taiping] akan mencadangkan:-

"Bahawa Dewan yang mulia ini meluluskan satu ketetapan supaya mengesyorkan kepada DYMM Seri Paduka Baginda Yang Di Pertuan Agong untuk menubuhkan satu Suruhanjaya Diraja supaya menyiasat dan mengemukakan laporan siasatan terhadap skandal kewangan 1MDB dengan kadar segera."

[Perdana Menteri]

20. PR-1343-U76228

Tuan Nga Kor Ming [Taiping] akan mencadangkan:-

"Bahawa Dewan yang mulia ini meluluskan satu ketetapan selaras dengan titah Majlis Raja-Raja Melayu dimana Akta Majlis Keselamatan Negara 2016 dibentang dan dikaji semula di Dewan Rakyat dengan kadar segera."

[Perdana Menteri]

21. PR-1343-U77356

Tuan M. Kulasegaran [Ipoh Barat] akan mencadangkan:-

"Bahawa Dewan ini mengambil maklum, Parlimen sepatutnya mengambil maklum kes penembakan Lucus a/l Asirvatham dari Ipoh semasa bekerja di kebunnya di Chemor Perak pada 11 Ogos 2016 oleh seorang bekas pegawai kanan polis. Kes penembakan tersebut perlu disiasat secara ketat dan efektif melalui penubuhan sebuah badan jawatankuasa yang bebas dan integriti serta laporannya diumumkan kepada orang ramai (made public)."

[Menteri Dalam Negeri]

22. PR-1343-U75910

Dr. Tan Seng Giaw [Kepong] akan mencadangkan:-

"Bahawa Dewan ini membahaskan langkah-langkah untuk mencegah pengganas di Malaysia."

[Menteri Dalam Negeri]

23. PR-1343-U75911

Dr. Tan Seng Giaw [Kepong] akan mencadangkan:-

"Bahawa Dewan ini memperbincangkan dasar penyelenggaraan semua jenis pengangkutan di negara".

[Menteri Pengangkutan]

24. PR-1343-U75794

Tuan Fong Kui Lun [Bukit Bintang] akan mencadangkan:-

"Bahawa Kerajaan mempergiatkan usaha untuk meyatupadukan rakyat berbilang kaum di Malaysia yang kelihatan masih lemah dan longgar meskipun negara telah menjadi negara merdeka dan berdaulat sejak 59 tahun lalu supaya mereka boleh hidup dengan aman dan saling memerlukan dan memahami antara satu sama lain bagi memudahkan mereka membangunkan ekonomi negara secara bersama dan merealisasikan impian Malaysia."

[Perdana Menteri]

25. PR-1343-U75795

Tuan Fong Kui Lun [Bukit Bintang] akan mencadangkan:-

"Bahawa Kerajaan memulihkan pilihan raya kerajaan tempatan seluruh negara supaya urustadbir Kerajaan menjadi lebih cekap, akauntabiliti dan bersih dengan mengambil langkah pertama untuk membuat kajian serius dan melakukan pungutan suara antara rakyat."

[Menteri Kesejahteraan Bandar, Perumahan dan Kerajaan Tempatan]

26. PR-1343-U75707

Tuan Loke Siew Fook [Seremban] akan mencadangkan:-

"Bahawa Dewan ini merakamkan sekalung tahniah dan setinggi-tinggi penghargaan kepada wira dan wirawati negara yang telah mengharumkan nama negara di Sukan Paralimpik dan Olimpik 2016 di Rio De Janeiro. Kejayaan Mohamad Ridzuan Mohamad Puzi acara 100 meter, Muhammad Ziyad Zolkefli acara lontar peluru dan Abdul Latif Romly acara lompat jauh merangkul tiga pingat emas pertama untuk Malaysia dalam Sukan Paralimpik serta dua rekod dunia yang dicapai oleh mereka adalah satu kejayaan yang luar biasa dan sangat dibanggakan. Atlet wanita Siti Noor Radiah Ismail yang memenangi pingat gangsa dalam acara lompat jauh di Sukan Paralimpik juga merupakan satu pencapaian yang membanggakan. Dewan ini juga merakamkan ucapan setinggi-tinggi tahniah terhadap atlet-atlet negara yang memenangi 4 pingat perak dan 1 pingat gangsa di Sukan Olimpik Rio 2016 iaitu pemenang pingat perak dalam acara badminton perseorangan lelaki Dato Lee Chong Wei, badminton beregu lelaki Goh V Shem-Tan Wee Kiong, badminton beregu campuran Chan Peng Soon-Goh Chan Ying dan pemenang pingat perak dalam acara terjun Pandelega Rinong-Chan Jun Heong serta pemenang pingat gangsa acara berbasikal keirin Azizulhasni Awang. Atlet-atlet tersebut telah mencapai keputusan yang terbaik untuk kontijen Malaysia dalam sejarah penyertaan negara dalam Sukan Olimpik dan kejayaan tersebut harus dibanggakan oleh seluruh rakyat Malaysia."

[Menteri Belia dan Sukan]

27. PR-1343-U77348

Tuan Liew Chin Tong [Kluang] akan mencadangkan:-

"Bahawa Dewan ini bersetuju mengurangkan peruntukan untuk JPM dan menyalurkan kepada peruntukan bagi hal ehwal pendidikan, pengangkutan awam, kesihatan dan kebajikan rakyat. Peruntukan untuk Jabatan Perdana Menteri telah dihadkan tahapnya pada tahun 2008 iaitu masing-masing sebanyak RM3.4 bilion bagi peruntukan pengurusan dan RM3.5 bilion untuk pembangunan. Ini membawa kepada jumlah keseluruhan sebanyak RM6.9 bilion. Berbanding 2016, anggaran peruntukan pengurusan dan pembangunan telah melepasi tahap ditetapkan pada 2008 tersebut iaitu masing-masing sebanyak RM5.9 bilion dan RM14 bilion yang membawa kepada jumlah keseluruhan RM20 bilion."

[Menteri Kewangan]

28. PR-1343-U77349

Tuan Liew Chin Tong [Kluang] akan mencadangkan:-

"Bahawa Dewan ini menyokong cadangan menetapkan sebarang pembelian aset atau sistem pertahanan yang melebihi 100 juta oleh Kementerian Pertahanan, mesti dibawa ke Parlimen dibahas dan diaudit oleh Jabatan Audit Negara supaya untuk syarat meneruskan pembelian ini. Ini juga bertujuan untuk mempertingkatkan integriti dan keberkesanan pembelian sistem pertahanan. Ini adalah diakibatkan oleh pembelian Kapal Selam Scorpene telah menimbulkan banyak persepsi negatif terhadap negara."

[Perdana Menteri]

29. PR-1343-U77437

Tuan Manivanan a/l Gowindasamy [Kapar] akan mencadangkan:-

"Bahawa Dewan ini mempertimbangkan cadangan untuk menghalang dan mengharamkan penjualan arak murahan (cheap liquor) secara mudah dan murah yang semakin berleluasa. Gejala pengambilan arak murahan ini menimbulkan pelbagai masalah sosial seperti keganasan rumah tangga dan gengsterisme serta merosakkan organ dalaman. Di samping itu, kawalan dan penyeliaan terhadap kedai-kedai menjual arak perlu diketatkan. Masa penjualan arak dan lokasi minum arak perlu dikaji. Kawasan tempat awam seperti di taman awam dan taman permainan kanak-kanak, minum arak wajib diharamkan. Dewan ini juga wajib mempertimbangkan penubuhan Pusat Pemulihan Arak (PPA) di setiap negeri di Malaysia untuk membendung masalah minum arak yang semakin berleluasa di kalangan anak muda merentasi sempadan bangsa dan agama."

[Menteri Dalam Negeri]

30. PR-1343-U77438

Tuan Manivanan a/l Gowindasamy [Kapar] akan mencadangkan:-

“Bahawa Dewan ini mempertimbangkan cadangan untuk kes kematian di bawah tahanan Polis DiRaja Malaysia, keluarga simati diberi kebenaran sepenuhnya untuk memperoleh Pakar Perubatan Forensik sendiri bagi mewakili pihak keluarga si mati semasa bedah siasat dijalankan.”

[Menteri Dalam Negeri]

31. PR-1343-U77439

Tuan Manivanan a/l Gowindasamy [Kapar] akan mencadangkan:-

“Bahawa Dewan ini mendesak agar pendidikan agama diperkenalkan di sekolah kepada pelajar bukan Islam sebagai langkah untuk menerapkan nilai-nilai murni dan keagamaan di kalangan pelajar bukan Islam bagi menangani gejala sosial yang kian meningkat dan berleluasa akibat daripada kegagalan sistem pendidikan di Malaysia.”

[Menteri Pendidikan]

32. **Tuan Gobind Singh Deo [Puchong]** akan mencadangkan:-

Pada 17.10.2016, Tuan Yang Di-Pertua telahpun membuat keputusan di dalam Dewan Rakyat seperti berikut:

Jadi masa tidak lagi mengizinkan. Jadi sesi pertanyaan-pertanyaan bagi jawapan lisan berakhir dan sebelum saya memanggil Setiausaha untuk beredar ke urusan mesyuarat yang lain, ada satu perkara mustahak yang ingin saya umumkan iaitu Ahli-ahli Yang Berhormat **saya mendapati beberapa soalan dalam pertanyaan jawapan lisan dan bertulis serta usul yang telah dikemukakan bagi Mesyuarat Ketiga Penggal Keempat Parlimen Ketiga Belas kali ini berkaitan dengan satu isu yang menjadi kegemaran ahli-ahli Yang Berhormat iaitu isu tindakan sivil in rem oleh Jabatan Keadilan Amerikat Syarikat atau singkat DOJ.**

Jadi untuk mengelakkan lagi satu pertuduhan seperti di sesi yang lalu iaitu di mana soalan yang perlu dijawab secara lisan oleh kerana tidak ada masa untuk dijawab pada ketika itu, maka Menteri menjawab mengatakan bahawa tidak payalah dijawab secara bertulis oleh kerana itu adalah *sub judice*.

Jadi dalam hal ini, dalam sesi ini juga ada perkara-perkara yang sedemikian. Jadi saya tidak mahu lagi timbul satu persepsi di mana Menteri akan dituduh bahawa dia *assumed the role of Speaker*. **Jadi untuk itu setelah meneliti isi kandungan pertanyaan-pertanyaan tersebut, saya mendapati bahawa ia adalah perkara yang masih dalam timbangan mahkamah ataupun sub judice. Oleh itu Menteri yang berkenaan tidak perlu jawab kepada perkara-perkara tersebut.**

Manakala kepada Ahli-ahli Yang Berhormat yang sedemikian untuk memuaskan hati mereka saya akan sampaikan setiap Ahli Yang Berhormat keputusan saya secara bertulis. Terima kasih. Sila.

Dengan hormatnya, saya usulkan supaya keputusan Tuan Yang Di-Pertua tersebut dikaji semula menurut Peraturan 43 Peraturan Majlis Mesyuarat di atas alasan-alasan berikut:

- (i) Peraturan yang menghalang pertanyaan oleh kerana sub judice tidak terpakai kepada kes-kes di luar Malaysia.
- (ii) Oleh yang demikian, tindakan *civil in rem* oleh Jabatan Keadilan Amerika Syarikat tidak boleh menjadi asas untuk penolakan soalan ataupun seseorang Menteri dikecualikan daripada menjawab soalan tersebut atas alasan perkara itu sub judis.
- (iii) Perkara ini dibincangkan dalam "Buku Erskine May's Treaties on The Law, Privileges, Proceeding's and Usage of Parliament 24th Edition 2011" di mana 365 dimukasurat disebut seperti berikut:

Matters sub judice

By a resolution of the House, cases in which proceedings are active in United Kingdom courts shall not be referred to in any motion, debate or question (see pp 396, 441-443); though the House has further resolved to give Chair some discretion to allow reference to be made to matters awaiting or under jurisdiction in all civil courts in certain specified circumstances, **provided that there is no real and substantial danger of prejudice to the proceedings.** The 'sub judice rule' as it is called, also applied to matters before a coroner's court or a Fatal Accident Inquiry. If the subject-matter of the question is found to be, or become, sub judice of the questions has been given, the Member is asked to withdraw it, or the Speaker may direct it to be removed from the notice paper or refuse to allow it to be asked if it is on the Order Paper.

The rule does not apply to matters which are sub judice in courts of law outside Great Britain and Northern Island, nor to matters which are the subject of administrative inquiry.

- (iv) jadi dengan segala hormatnya, jelas bahawa keputusan Tuan Speaker yang berasaskan kepada alasan sub judice adalah bertentangan dengan praktis yang diamalkan berkenaan isu itu dan oleh yang sedemikian boleh dan perlu dikaji semula.
2. Seterusnya dengan merujuk kembali lagi kepada petikan di dalam buku Erskine May di atas adalah jelas bahawa **sekiranya pun prosiding tersebut di dalam negara ini**, Tuan Speaker dalam memutuskan isu sama ada ataupun tidak perkara ini dihalang kerana sub judice perlu menilai sama ada wujud ataupun tidak "*real and substantial danger of prejudice*" kepada prosiding tersebut.
- (i) Dengan segala hormatnya untuk menimbang dan seterusnya membuat keputusan berkenaan perkara itu, saya berpendapat bahawa Tuan Speaker perlu:

- (a) memberikan Ahli-ahli Parlimen peluang untuk didengar sebelum membuat sebarang keputusan berkenaannya.
 - (b) menyakinkan diri dengan rujukan penuh kepada prosiding Mahkamah tersebut dan seterusnya menimbangkan kesan soalan-soalan yang ditanya kepada prosiding tersebut sebelum membuat keputusan tersebut.
- 2 (ii) Di dalam hal ini, saya memohon supaya Tuan Speaker menjelaskan sama ada ataupun tidak Tuan Speaker ada salinan dan sudah menimbangkan dengan mendalam semua kertas-kertas kuasa dalam prosiding DOJ tersebut (iaitu tuntutan dan jawapan-jawapan kepadanya sekiranya ada) untuk menyakinkan diri Tuan Speaker berkenaan fakta-fakta serta isu-isu yang berbangkit dalam perkara itu untuk membuat keputusan bahawa soalan-soalan itu adalah dihalang oleh perkara *sub judice*.
- 3 (i) seterusnya saya dengan segala hormatnya memohon rujuk kepada Peraturan 36(1) dan 23(1)(g) Peraturan Mesyuarat Dewan Rakyat di mana cukup jelas bahawa perkara yang perlu diputuskan adalah:
- 23(1)(g) A question shall not be so drafted as to be likely to prejudice a case under trial, or be asked to any matter **which is sub judice**; dan
- 36(2) Reference shall not be made to any matter which is sub judice in such a way might in the opinion of chair ***prejudice the interests of parties thereto***”
- 3 (ii) Dengan segala hormatnya, menurut Peraturan tersebut Tuan Speaker perlu untuk menentusahkan “parties” kepada tindakan ini dan kepentingan mereka sebelum keputusan berkenaan prejudis yang mungkin timbul seakibat soalan yang diajukan itu.

Tuan Speaker,

Negara kami dilanda krisis dan segi wujudnya satu perkara yang melibatkan wang yang sangat besar yang kini menjadi topik perbincangan hangat bukan sahaja di Malaysia tetapi di seluruh dunia.

Perkara ini telahpun menyebabkan tindakan yang tegas diambil oleh negara-negara seperti Singapura, United Kingdom dan Amerika Syarikat manakala di negara kita tiada sebarang tindakan berkesan diambil terhadap mana-mana pihak sama sekali sehingga sekarang.

Perkara ini telahpun menyebabkan banyak soalan ditanya oleh rakyat Malaysia khususnya berkenaan corak pentadbiran Kerajaan kami dan pengendalian siasatan perkara ini oleh jabatan-jabatan seperti Jabatan Peguam Negara, PDRM dan SPRM.

Isu ini sudah semestinya menjadi satu isu berkepentingan awam dan amat sangat perlu dibahaskan di dalam Dewan Rakyat.

Keputusan Tuan Speaker dengan segala hormatnya mempunyai kesan menghalang perkara ini daripada dibahaskan secara transparan dan juga memprejudiskan kesemua pihak dengan amat sangat oleh kerana mereka kehilangan peluang untuk menyoal dan menjelaskan semua keraguan yang timbul di dalam Dewan Rakyat yang mulia ini untuk pengetahuan rakyat Malaysia secara keseluruhannya.

Saya juga merayu kepada Tuan Speaker supaya melihat kepada “precedent” yang akan dicapai melalui keputusan ini di mana daripada sekarang, mudah sekali untuk sesiapa menghalang sesuatu perkara itu dibangkitkan di Dewan Rakyat iaitu dengan memfailkan atau merujuk kepada prosiding di luar negara untuk tujuan itu.

Ini kepada saya bukan niat ataupun matlamat yang ingin dicapai oleh Peraturan Mesyuarat yang digubal untuk “enhance” dan bukannya “restrict” dengan izin, perbincangan perkara-perkara penting untuk negara kita di dalam Dewan Rakyat yang mulia ini.

Maka saya selaku Ahli Parlimen Puchong merayu supaya usul saya dibenarkan dibahas dan keputusan Tuan Speaker itu, dikaji semula dan diketepikan dengan serta merta.

[Perdana Menteri]

RISALAT-RISALAT YANG DIBAWA KE DALAM MESYUARAT
(DEWAN RAKYAT)

<u>TAHUN</u> <u>2016</u>	<u>RISALAT/DOKUMEN</u>	<u>TARIKH</u> <u>DIBENTANGKAN</u>
ST.89	Laporan Tahunan dan Penyata Kewangan Majlis Agama Islam Wilayah Persekutuan (MAIWP) Bagi Tahun 2015.	31 Oktober 2016
ST.97	Laporan Tahunan dan Penyata Kewangan Majlis Peperiksaan Malaysia (MPM) Bagi Tahun 2015.	31 Oktober 2016
CMD.29	Laporan Tahunan Suruhanjaya Perkhidmatan Kehakiman dan Perundangan Bagi Tahun 2015.	31 Oktober 2016

****UCAPAN**
(PERATURAN MESYUARAT 17 BAHARU)
(KAMAR KHAS)

Tarikh Ucapan	Ahli Yang Berucap	Tajuk Ucapan	Menteri Yang Bertanggungjawab
1. 31.10.2016 (Isnin)	1. YB Puan Teo Nie Ching (Kulai)	1. Penggantungan Biasiswa Tajaan JPA Pelajar Cemerlang 2013 – Kini apakah nasib mereka.	1. YB Menteri Di Jabatan Perdana Menteri

**** Ucapan Di Bawah Usul Berkenaan Perkara Tadbir Kerajaan (Peraturan Mesyuarat 17 Baharu)**